

**Aneks II naloga supervizora od 6. maja 2008. godine
kojim se donose izmjene Statuta Brčko distrikta,
Izborni zakon Brčko distrikta, Poslovník o radu Skupštine Brčko
distrikta i izmjene odgovarajućih propisa Brčko distrikta**

**Izborni zakon Brčko distrikta Bosne i Hercegovine
koji stupa na snagu 6. maja 2008. godine**

**IZBORNI ZAKON
BRČKO DISTRIKTA BOSNE I HERCEGOVINE**

Poglavlje 1

Opće odredbe

Član 1.1

- (1) Ovim zakonom uređuje se izbor zastupnika u Skupštinu Brčko Distrikta Bosne i Hercegovine (u daljnjem tekstu: "Skupština Distrikta").
- (2) Na sva pitanja koja nisu izričito uređena ovim zakonom neposredno se primjenjuju odredbe Izbornog zakona Bosne i Hercegovine (u daljnjem tekstu: Izborni zakon BiH).

Član 1.2

Nazivi koji se koriste u ovom zakonu imaju sljedeća značenja:

1. „*Politički subjekt*“ podrazumijeva političku stranku, nezavisnog kandidata, koaliciju ili listu nezavisnih kandidata ovjerenu za učešće na izborima u skladu sa ovim zakonom.
2. „*Izborna jedinica*“ podrazumijeva:
 - a. izbornu jedinicu Brčko distrikt Bosne i Hercegovine (u daljnjem tekstu: Distrikt);
 - b. entitetsku izbornu jedinicu u kojoj se bira i konstituiše entitetski nivo vlasti, koja unutar sebe ima višečlane izborne jedinice;
 - c. entitetsku izbornu jedinicu u kojoj se bira državni nivo vlasti.
3. „*Izborna kampanja*“ podrazumijeva period utvrđen ovim zakonom u kojem politički subjekt na zakonom utvrđen način upoznaje birače i javnost sa svojim programom i kandidatima za predstojeće izbore.
4. „*Pripadnik nacionalne manjine*“ je državljanin Bosne i Hercegovine koji ne pripada nijednom od tri konstitutivna naroda. Nacionalnu manjinu čine ljudi istog ili sličnog etničkog porijekla, iste ili slične tradicije, običaja, vjerovanja, jezika, kulture i duhovnosti i bliske ili srodne historije i drugih obilježja.

Član 1.3

Izbori zastupnika za Skupštinu Distrikta vrše se na osnovu općeg i jednakog biračkog prava, neposrednim i tajnim glasanjem.

Član 1.4

Pravo da bira i bude biran (u daljnjem tekstu: biračko pravo) u Skupštinu Distrikta ima lice koje ispunjava sljedeće uslove:

1. da je državljanin Bosne i Hercegovine;
2. da ima prebivalište u Distriktu;
3. da je punoljetno;
4. da je upisano u Centralnom biračkom spisku.

Član 1.5

Teritorija Distrikta je jedna izborna jedinica za izbor zastupnika u Skupštinu Distrikta ili bilo koju drugu izbornu funkciju u Distriktu u skladu sa Statutom i drugim propisima Distrikta.

Član 1.6

Sredstva za sprovođenje izbora iz člana 1.1 ovog zakona obezbjeđuju se iz budžeta Distrikta.

Član 1.7

Izabrani zastupnik u Skupštini Distrikta može biti nosilac samo jedne izborne javne funkcije. Zastupnici ne mogu biti nosioci bilo koje druge izborne javne funkcije na državnom nivou, kao ni na nivou entiteta, osim ukoliko je drugačije predviđeno zakonom.

Član 1.8

- (1) Mandat pripada izabranom nosiocu mandata, a ne političkoj stranci, koaliciji ili listi nezavisnih kandidata koja ga je predložila na kandidatskoj listi. Mandat ne može prestati osim u zakonom predviđenim slučajevima.
- (2) Ukoliko izabrani nosilac mandata, u toku trajanja mandata, istupi iz političke stranke, koalicije ili liste nezavisnih kandidata koja je učestvovala na izborima i na čijoj je kandidatskoj listi bio, izabrani nosilac mandata postaje nezavisni zastupnik.

Član 1.9

Izabranom zastupniku u Skupštini Distrikta prestaje mandat prije isteka vremena na koje je izabran u slučajevima predviđenim Izbornim zakonom BiH.

Član 1.10

Kandidati svih političkih stranaka, koalicija, lista nezavisnih kandidata, kao i nezavisni kandidati i drugi učesnici u izbornom procesu, imaju potpunu slobodu da tokom izborne kampanje vrše izborne aktivnosti na cijeloj teritoriji Distrikta. Institucije Distrikta osigurat će slobodu kretanja kandidata, pristalica i birača tokom cijelog izbornog procesa.

Poglavlje 2

Organi nadležni za sprovođenje izbora

Član 2.1

- (1) Organi nadležni za sprovođenje izbora su Izborna komisija Distrikta i birački odbori.
- (2) Članovi Izborne komisije Distrikta imaju pravo na naknadu za rad u skladu sa odlukom Skupštine Distrikta i Izbornim zakonom BiH.
- (3) Članovi biračkih odbora imaju pravo na naknadu za rad u skladu sa odlukom Izborne komisije Distrikta i Izbornim zakonom BiH.
- (4) Sredstva za naknadu za rad Izborne komisije Distrikta i biračkih odbora, iz stavova 2 i 3 ovog člana, obezbjeđuju se iz budžeta Distrikta.

Član 2.2

- (1) U skladu sa Izbornim zakonom BiH, članove Izborne komisije Distrikta imenuje Skupština Distrikta uz saglasnost Centralne izborne komisije Bosne i Hercegovine (u daljnjem tekstu: Centralna izborna komisija BiH) na osnovu javnog oglasa u skladu sa procedurom koju utvrđuje Centralna izborna komisija BiH posebnim propisom.
- (2) Članove Izborne komisije Distrikta razrješava Skupština Distrikta uz saglasnost Centralne izborne komisije BiH u skladu sa Izbornim zakonom BiH.
- (3) Član Izborne komisije Distrikta imenuje se na period od sedam (7) godina.
- (4) Član Izborne komisije Distrikta ne može biti zastupnik, odnosno opunomoćenik političkog subjekta koji učestvuje na izborima, niti lice koje je pravosnažnom sudskom presudom osuđeno na kaznu zatvora u trajanju od šest mjeseci ili duže.
- (5) Članove biračkog odbora imenuje Izborna komisija Distrikta za svake izbore.

Član 2.3

Članovi Izborne komisije Distrikta mogu biti: predsjednici i sudije sudova Distrikta, lica zaposlena u Stručnoj službi Skupštine Distrikta, lica zaposlena u javnoj upravi Distrikta i druga lica, ako ispunjavaju uslove određene članom 2.2 Izbornog zakona BiH, i nisu u sukobu s članom 2.3 Izbornog zakona BiH.

Član 2.4

Izborna komisija Distrikta:

1. predlaže budžet Izborne komisije Distrikta i podnosi izvještaj o izvršenju budžeta Skupštini Distrikta;
2. donosi propise za sprovođenje ovog zakona;
3. osigurava da sve kandidatske liste za Skupštinu Distrikta budu sastavljene u skladu sa zakonom i dostavlja ih na odobrenje Centralnoj izbornoj komisiji BiH;
4. nadgleda i kontroliše rad Centra za birački spisak;
5. određuje biračka mjesta na području Distrikta za glasanje na svim nivoima vlasti u Bosni i Hercegovini;

6. sprovodi postupak imenovanja, imenuje i obučava članove biračkih odbora;
7. osigurava bezbjednost i dostavu izbornog materijala za glasanje na svim nivoima izbora u Bosni i Hercegovini biračkim odborima;
8. obavještava birače o informacijama neophodnim za sprovođenje izbora, u skladu sa propisima Centralne izborne komisije BiH;
9. odgovorna je za tehničku pripremu biračkog mjesta i druge tehničke pripreme za izbore u Distriktu;
10. odgovorna je za pravilno brojanje glasačkih listića na biračkim mjestima i u centrima za brojanje glasova;
11. prikuplja izborni materijal i objedinjuje rezultate izbora sa svih biračkih mjesta u Distriktu, posebno za svaki organ za koji je vršen izbor, i prosljeđuje rezultate Centralnoj izbornoj komisiji BiH; i
12. obavlja i sve druge poslove u skladu sa zakonom, i propisima Centralne izborne komisije BiH.

Član 2.5

- (1) Sastav Izborne komisije Distrikta je multietnički, tako da odražava strukturu stanovništva Distrikta.
- (2) Ako Centralna izborna komisija BiH poništi imenovanje članova Izborne komisije Distrikta zbog povrede stava 1 ovog člana, Skupština Distrikta vrši novo imenovanje, u roku od petnaest (15) dana od dana donošenja odluke od Centralne izborne komisije BiH u skladu sa kriterijima iz stava 1 ovog člana.
- (3) Ako Izborna komisija Distrikta ne bude opet uspostavljena na odgovarajući način, Centralna izborna komisija BiH imenuje članove Izborne komisije Distrikta u skladu sa stavom 1 ovog člana.

Član 2.6

Izborna komisija Distrikta donosi odluke prostom većinom od ukupnog broja članova, osim ukoliko je drugačije određeno ovim zakonom.

Član 2.7

- (1) Birački odbor sastoji se od predsjednika i dva (2) ili četiri (4) člana zavisno od broja birača na određenom biračkom mjestu.
- (2) Predsjednik i članovi biračkog odbora imaju zamjene.
- (3) Imenovanje članova biračkog odbora i njihovih zamjena vrši Izborna komisija Distrikta najkasnije u roku od trideset (30) dana prije dana održavanja bilo kojih izbora u skladu sa Izbornim zakonom BiH.
- (4) Izborna komisija Distrikta imenuje članove biračkog odbora vodeći računa o multietničkom sastavu biračkog odbora gdje je to moguće.
- (5) Ako Izborna komisija Distrikta ne imenuje članove biračkog odbora i njihove zamjene u skladu s ovim članom, članove biračkog odbora i njihove zamjene imenuje Centralna izborna komisija BiH.
- (6) Birački odbori neposredno rukovode radom biračkih mjesta, osiguravaju pravilnost i tajnost glasanja i evidentiraju rezultate glasanja na biračkim mjestima.
- (7) Predsjednik biračkog odbora osigurava da se proces glasanja na biračkim mjestima odvija neometano, u skladu sa Izbornim zakonom BiH.

Poglavlje 3

Birački spisak

Član 3.1

- (1) Centralni birački spisak je evidencija o državljanima Bosne i Hercegovine koji imaju biračko pravo u skladu sa zakonom.
- (2) Izvod iz Centralnog biračkog spiska za izbornu jedinicu Distrikt se uspostavlja na osnovu podataka sadržanih u Centralnom biračkom spisku, koji sadrži podatke o svim biračima sa pravom glasa za izbornu jedinicu Distrikt u skladu sa Izbornim zakonom BiH.
- (3) Odjeljenje za javni registar Vlade Distrikta odgovorno je za ispravnost, vjerodostojnost i ažurnost podataka koji su neophodni za vođenje Centralnog biračkog spiska u skladu sa Izbornim zakonom BiH.

Član 3.2

- (1) Odjeljenje za javni registar, u saradnji sa Izbornom komisijom Distrikta, uspostavlja Centar za birački spisak, koji obavlja poslove u skladu sa Izbornim zakonom BiH.
- (2) Odjeljenje za javni registar, u saradnji sa Izbornom komisijom Distrikta, obučava osoblje Centra za birački spisak.

Poglavlje 4

Ovjera i kandidovanje za izbore za Skupštinu Distrikta

Član 4.1

- (1) Na izborima za zastupnike u Skupštini Distrikta mogu učestvovati političke stranke, nezavisni kandidati, koalicije i liste nezavisnih kandidata.
- (2) Da bi učestvovala na izborima, politička stranka mora biti registrovana u Osnovnom sudu Distrikta ili u drugom nadležnom organu u skladu sa zakonom. Uz prijavu za ovjeru mora se priložiti dokaz, koji nije stariji od šezdeset (60) dana od dana podnošenja prijave, da je politička stranka uredno registrovana. Politička stranka mora podnijeti prijavu za ovjeru pod istim nazivom pod kojim je registrovana.

Član 4.2

- (1) Da bi učestvovali na izborima, političke partije, nezavisne kandidate, koalicije i liste nezavisnih kandidata ovjerava Centralna izborna komisija BiH, na osnovu prijave za učestvovanje na izborima (u daljnjem tekstu: "prijava").
- (2) Prijava se, zajedno sa svom potrebnom dokumentacijom i podacima predviđenim zakonom, preko Izborne komisije Distrikta dostavlja Centralnoj izbornoj komisiji BiH.
- (3) Centralna izborna komisija BiH ovjerava prijavu za izbore ako su ispunjeni svi uslovi propisani zakonom.

Član 4.3

- (1) Da bi bili ovjereni za učestvovanje na izborima za sve organe vlasti na svim nivoima vlasti u Bosni i Hercegovini, nezavisni kandidati ili kandidati na kandidatskoj listi političke stranke, nezavisni kandidati ili kandidatske liste koalicije moraju ispunjavati sljedeće uslove:
 - a) moraju biti upisan u Centralni birački spisak;
 - b) mogu se kandidovati samo za funkciju u jednoj izbornoj jedinici, na bilo kojem nivou vlasti i mogu se pojaviti na samo jednoj listi političke stranke, koalicije ili listi nezavisnih kandidata.
- (2) Prijava za izbornu funkciju za izbornu jedinicu Distrikt, uključuje izjavu koju je potpisao predsjednik političke stranke, koalicije ili nezavisni kandidat u Distriktu, da će ta politička stranka, koalicija ili nezavisni kandidat preduzimati sve aktivnosti u skladu sa Općim okvirnim sporazumom za mir u Bosni i Hercegovini i odlukama Tribunala za spor oko međuentitetske linije razgraničenja u oblasti Brčkog i relevantnim nalogima supervizora za Brčko.

Član 4.4

- (1) Prijava političke stranke mora sadržavati listu s najmanje dvije stotine (200) potpisa birača upisanih u Centralni birački spisak za izbornu jedinicu Distrikt.
- (2) Politička stranka koja je zastupljena u Skupštini Distrikta je oslobođena obaveze prikupljanja potpisa za sljedeće izbore.
- (3) Politička stranka podnosi prijavu najkasnije sto trideset pet (135) dana prije izbora.

Član 4.5

- (1) Prijava nezavisnog kandidata mora sadržavati listu s najmanje stotinu (100) potpisa birača upisanih u Centralni birački spisak za izbornu jedinicu Distrikt.
- (2) Nezavisni kandidat je oslobođen obaveze prikupljanja potpisa iz stava 1 ovog člana ukoliko je zastupnik u Skupštini Distrikta u vrijeme podnošenja prijave.
- (3) Nezavisni kandidat podnosi prijavu najkasnije sto trideset pet (135) dana prije izbora.

Član 4.6

- (1) Dvije (2) ili više ovjerenih političkih stranaka mogu formirati koaliciju i Centralnoj izbornoj komisiji BiH podnijeti prijavu pod jednim imenom u skladu sa Izbornim zakonom BiH. Koalicija podnosi prijavu najkasnije sto deset (110) dana prije dana izbora.
- (2) Koalicija ima status političke stranke u izbornom procesu od dana ovjere za učestvovanje na izborima do dana ovjere izbornih rezultata. Politička stranka se, kao član koalicije, ne može povući iz ovjerene koalicije sve do ovjere izbornih rezultata.
- (3) Koalicija može zadržati ime pod kojim je bila ovjerena za prethodne izbore samo ako je sačinjavaju iste političke stranke koje su bile ovjerene kao koalicija na prethodnim izborima.

Član 4.7

Dva (2) ili više ovjerenih nezavisnih kandidata mogu se udružiti i podnijeti jednu listu nezavisnih kandidata, pod jednim imenom. Lista nezavisnih kandidata podnosi svoju prijavu za ovjeru najkasnije sto deset (110) dana prije dana izbora.

Član 4.8

Broj kandidata na kandidatskoj listi političke stranke, koalicije ili na listi nezavisnih kandidata neće biti veći od 32. Ove liste podnose se Izornoj komisiji Distrikta koja ih u skladu sa Izbornim zakonom BiH dostavlja na ovjeru Centralnoj izbornoj komisiji BiH.

Poglavlje 5

Glasanje / Sprovođenje izbora

Član 5.1

Glasanje se vrši u skladu s poglavljem 5 Izbornog zakona Bosne i Hercegovine. Centralna izborna komisija BiH utvrđuje formu i sadržaj glasačkog listića.

Poglavlje 6

Zaštita izbornog prava

Član 6.1

- (1) Birač i politički subjekt čije je pravo, uspostavljeno zakonom, povrijeđeno, može Izornoj komisiji Distrikta uložiti prigovor najkasnije u roku od četrdeset osam (48) sati od učinjene povrede.
- (2) Izborna komisija Distrikta ima prvostepenu nadležnost u odlučivanju o svim pitanjima koja nisu izričito u nadležnosti Centralne izborne Komisije BiH, shodno članovima 6.4 i 6.6. Izbornog zakona BiH.

Član 6.2

- (1) Prigovor se podnosi na obrascu koji je propisala Centralna izborna komisija BiH. Prigovor sadrži kratak opis povrede i dokaze kojima se potvrđuju navodi prigovora. Prigovor mora potpisati podnosilac prigovora. Ako je podnosilac prigovora politička stranka ili koalicija, prigovor potpisuje predsjednik ili ovlašteni predstavnik političke stranke ili koalicije uz priloženo ovlaštenje.
- (2) Prigovor se bez odlaganja dostavlja svim stranama navedenim u prigovoru. Strane navedene u prigovoru mogu se izjasniti o navodima prigovora u pisanoj formi u roku od dvadeset četiri (24) sata od prijema prigovora. Izborna komisija Distrikta može odrediti saslušanje strana.
- (3) Izborna komisija Distrikta rješava prigovore u skladu s proceduralnim uputstvima za rješavanje prigovora koje je utvrdila Centralna izborna komisija BiH i Izbornim zakonom BiH.

Član 6.3

- (1) Izborna komisija Distrikta dužna je da razmotri prigovor i donese odluku najkasnije u roku od četrdeset osam (48) sati nakon isteka roka utvrđenog članom 6.2, stava 2, ovog zakona i da o svojoj odluci odmah obavijesti podnosioca prigovora i druge strane navedene u odluci.
- (2) Prilikom rješavanja prigovora, Izborna komisija Distrikta može postupiti na osnovu utvrđenih činjenica ili održavati saslušanja radi utvrđivanja činjenica.
- (3) Prigovor koji je prema članu 6.1 ovog zakona podnijelo neovlašteno lice, odnosno prigovor podnesen neblagovremeno ili nepotpun prigovor, odbacuje se.

Član 6.4

Izborna komisija Distrikta može primijeniti mjere koje su predviđene Izbornim zakonom BiH kako bi otklonila nepravilnosti prigovora iz člana 6.3 ovog zakona.

Član 6.5

- (1) Na odluke Izborne komisije Distrikta može se uložiti žalba Centralnoj izbornoj komisiji BiH.
- (2) Žalba se podnosi najkasnije u roku od četrdeset osam (48) sati od kada podnosilac prigovora i druge strane navedene u odluci prime prvostepenu odluku u skladu sa Izbornim zakonom BiH.

Poglavlje 7

Pravila ponašanja političkih stranaka, koalicija i lista nezavisnih kandidata i nezavisnih kandidata

Član 7.1

Političke stranke, koalicije, liste nezavisnih kandidata i nezavisni kandidati imaju pravo da vode izbornu kampanju u skladu s poglavljem 7 Izbornog zakona BiH.

Član 7.2

Nadležni organi Distrikta dužni su da osiguraju ravnopravan tretman političkim strankama, koalicijama, listama nezavisnih kandidata i nezavisnim kandidatima koji su ovjereni za učestvovanje na izborima u njihovim zahtjevima da javna mjesta i javne objekte koriste u svrhu izborne kampanje, uključujući održavanje skupova, postavljanje oglasa, plakata, postera i drugog sličnog materijala.

Poglavlje 8

Skupština Distrikta

Član 8.1

- (1) Skupština Distrikta ima trideset jednog (31) zastupnika, od kojih dva (2) zastupnika predstavljaju nacionalne manjine u Distriktu.
- (2) Mandat u Skupštini traje četiri (4) godine i ističe nakon ovjere rezultata narednih izbora.

Član 8.2

- (1) Mandati se raspodjeljuju na sljedeći način:
 - a) Za svaku političku stranku i koaliciju, ukupan broj važećih glasova koje je politička stranka ili koalicija osvojila dijeli se sa 1, 3, 5, 7, 9, 11 i tako redom, sve dok je to potrebno za tu raspodjelu mandata. Brojevi koji se dobiju ovom serijom dijeljenja su "količnici". Broj glasova za nezavisnog kandidata je količnik za tog kandidata.
 - b) Količnici se redaju od najvećeg do najmanjeg. Mandati se dijele po redu, počev od najvećeg količnika, dok se ne raspodijele mandati.
- (2) Politička stranka, koalicija, lista nezavisnih kandidata i nezavisni kandidati ne mogu učestvovati u raspodjeli mandata ako ne osvoje više od tri (3) % od ukupnog broja važećih glasačkih listića u izbornoj jedinici Distrikt.
- (3) Osim ukoliko svaki od konstitutivnih naroda (Bošnjaci, Srbi, Hrvati) ne osvoji minimalan broj od tri (3) mandata, naknadno će se izvršiti korekcija mandata, te će se mandati dodijeliti kandidatima tog naroda koji nije osvojio minimalan broj mandata i to sa liste političke stranke, koalicije, liste nezavisnih kandidata, odnosno nezavisnom kandidatu koji su osvojili najveći broj glasova i koji su kvalifikovani kandidati iz reda konstitutivnog naroda koji nije dobio dovoljan broj mandata.
- (4) Ukoliko politička stranka, koalicija ili lista nezavisnih kandidata nema dovoljno kvalifikovanih kandidata iz reda relevantnog konstitutivnog naroda, ili nema kvalifikovanog nezavisnog kandidata iz reda tog naroda da popuni mjesta koja su upražnjena, mandat se prenosi na listu stranke ili koalicije, nezavisnom kandidatu odnosno listi nezavisnih kandidata, koja je osvojila najveći broj glasova i koja ima još takvih kandidata na svojoj listi.
- (5) Kao kvalifikovani kandidati u smislu stava 4 ovog člana smatraju se kandidati koji se nalaze na listama političkih stranaka, koalicija, listama nezavisnih kandidata ili nezavisni kandidati koji ispunjavaju uslove propisane ovim zakonom.

Član 8.3

- (1) Ako je političkoj stranci, koaliciji ili listi nezavisnih kandidata dodijeljen broj mandata koji je jednak broju kandidata na njihovoj listi, a pri tome je ostalo još mandata koje treba dodijeliti, preostali količnici za te političke stranke, koalicije ili liste nezavisnih kandidata zanemaruju se pri raspodjeli preostalih mandata. Ako nezavisni kandidat osvoji mandat, preostali količnici za tog nezavisnog kandidata zanemaruju se pri raspodjeli preostalih mandata.
- (2) Ako je rezultat isti zbog identičnih količnika, mandat se dodjeljuje žrijebanjem.
- (3) Mandati koje je osvojila lista raspodjeljuju se najprije među kandidatima sa te liste, od kojih je svaki dobio najmanje pet procenata (5%) od ukupnog broja važećih glasova koje je ta lista dobila i to dodjelom mandata prema redoslijedu od najvećeg do najmanjeg broja glasova. Ako je pri tome ostalo još mandata koje treba dodijeliti listi, a preostali kandidati su dobili manje od pet procenata (5%) od ukupnog broja važećih glasova koje je ta lista dobila, raspodjela

mandata među preostalim kandidatima s liste vrši se prema njihovom redoslijedu na listi.

Član 8.4

- (1) Ako mandat kandidata s liste političke stranke, koalicije ili nezavisnih kandidata prestane u skladu s članom 1.8 ovog zakona, mandat se dodjeljuje sljedećem kandidatu, u skladu s članom 8.2 ovog zakona.
- (2) Ako mandat nezavisnog kandidata koji nije bio na listi nezavisnih kandidata prestane u skladu s članom 1.8 ovog zakona, mandat ostaje upražnjen.

Član 8.5

- (1) Ukoliko su iscrpljene sve procedure propisane članom 8.4 i u slučaju da broj zastupnika bude manji od tročetvrtinske (3/4) većine zastupnika koji treba da budu izabrani, raspisuju se prijevremeni izbori.
- (2) Mandat Skupštine izabrane na prijevremenim izborima traje do isteka mandata prethodno izabrane Skupštine.
- (3) Centralna Izborna komisija Bosne i Hercegovine propisuje sve rokove potrebne za sprovođenje prijevremenih izbora.

Poglavlje 9

Učešće pripadnika nacionalnih manjina u izborima

Član 9.1

- (1) Pripadnici nacionalnih manjina imaju pravo na zastupljenost u Skupštini Distrikta u skladu sa Statutom i ovim zakonom.
- (2) Pripadnicima nacionalnih manjina zagarantovana su dva mandata u Skupštini Distrikta.

Član 9.2

- (1) Da bi se ovjerili za učestvovanje na izborima za popunu zagarantovanih mandata za pripadnike nacionalnih manjina u Skupštini Distrikta, političke stranke i nezavisni kandidati podnose prijavu za učešće na izborima u skladu s odredbama ovog zakona.
- (2) Registrovano udruženje ili drugi registrovani organizovani oblik djelovanja nacionalnih manjina i grupa od najmanje četrdeset (40) građana koji imaju biračko pravo i koji uz prijavu za učešće na izborima dostavljaju i imena kandidata također imaju pravo prijave za učešće na izborima za popunu zagarantovanih mandata za pripadnike nacionalnih manjina.
- (3) Kandidati koje predloži udruženje, odnosno drugi registrovani organizovani oblik djelovanja nacionalnih manjina ili grupa od najmanje četrdeset (40) građana koji imaju biračko pravo imaju status nezavisnog kandidata.
- (4) Političke stranke, koalicije političkih stranaka, udruženja nacionalnih manjina i drugi registrovani organizovani oblici nacionalnih manjina, te grupa od najmanje četrdeset (40) građana koji imaju biračko pravo mogu predložiti najviše onoliko kandidata koliko se pripadnika nacionalnih manjina bira u izbornoj jedinici Distrikt.

Član 9.3

- (1) Nakon što se ovjeri kandidatura svakog pojedinačnog kandidata, Centralna izborna komisija BiH utvrđuje konačnu posebnu listu kandidata pripadnika nacionalnih manjina za Skupštinu Distrikta.
- (2) Kao predstavnik nacionalne manjine može biti izabran samo onaj kandidat čije ime se nalazi na posebnoj listi kandidata pripadnika nacionalnih manjina predloženih u skladu s odredbama ovog člana.
- (3) Posebna lista kandidata pripadnika nacionalnih manjina iz stava 1 ovog člana nalazi se na glasačkom listiću iza listi ostalih političkih subjekata čije se kandidatske liste takmiče za redovne mandate za Skupštinu Distrikta.
- (4) Redoslijed kandidata na posebnoj listi iz stava 3 ovog člana utvrđuje se žrijebanjem na način i prema postupku koji utvrdi Centralna izborna komisija BiH.

Član 9.4

- (1) Birač ima samo jedan glas. Ako se birač opredijeli da glasa za posebnu listu kandidata pripadnika nacionalnih manjina, on glasa tako što označava ime samo jednog kandidata na posebnoj listi kandidata pripadnika nacionalnih manjina i ne može da glasa za bilo koji drugi politički subjekt ili kandidata na glasačkom listiću.
- (2) Za predstavnika pripadnika nacionalne manjine biraju se kandidati koji dobiju najveći broj važećih glasova na posebnoj listi kandidata pripadnika nacionalnih manjina.

Član 9.5

- (1) Odredbe člana 8.2 stava 2 ovog zakona ne primjenjuju se prilikom raspodjele mandata sa liste pripadnika nacionalnih manjina.
- (2) Pri raspodjeli mandata, prvo se dodjeljuju mandati zagwarantovani pripadnicima nacionalnih manjina, a zatim redovni mandati u skladu sa članom 8.2 ovog zakona.
- (3) U slučaju da dva kandidata na posebnoj listi kandidata pripadnika nacionalnih manjina dobiju isti broj važećih glasova, mandat se dodjeljuje žrijebanjem koje organizuje Centralna izborna komisija BiH. Samo u slučaju da dva prvoplasirana kandidata osvoje podjednak broj važećih glasova mandati im se dodjeljuju bez žrijebanja.
- (4) Ako se ne dodijeli pripadniku nacionalne manjine mandat ostaje upražnjen.
- (5) U skladu s članom 1.8 ovog zakona i Izbornim zakonom BiH, u slučaju da se utvrdi da izabrani nosilac mandata iz člana 9.4, stava 2, zapravo nije pripadnik nacionalne manjine za koju se u prijavi izjasnio da joj pripada, to se uzima kao razlog za prestanak njegovog mandata.
- (6) U slučaju prestanka mandata izabranog nosioca mandata iz člana 9.4, stava 2, u smislu odredbi člana 1.8 ovog zakona, zamjenski mandat dodjeljuje se kandidatu sa sljedećim najvećim brojem dobijenih važećih glasova na posebnoj listi kandidata pripadnika nacionalnih manjina. Ako je lista iscrpljena, mandat ostaje upražnjen.
- (7) Za sve što nije regulisano ovim poglavljem, uređuje se općim odredbama ovog zakona i Izbornog zakona BiH.

Poglavlje 10

Završne odredbe i stupanje na snagu

Član 10.1

Stupanjem na snagu ovog zakona, stavlja se van snage Izborni zakon Brčko distrikta BiH (“Službeni glasnik Brčko distrikta BiH”, broj: 20/03).